


„BH Telecom“ kažnjen sa 150.000 KM

5.3.2014



Konkurencijsko vijeće BiH nedavno je "BH Telecomu" izreklo novčanu kaznu u iznosu od 150.000 KM jer je zloupotrijebio dominantni položaj na tržištu interkonekcije, saznaje "Dnevni avaz".

Protiv ovog rješenja kompanija nema pravo žalbe, a upravni spor može pokrenuti pred Sudom BiH.

Nova kazna

Ovim rješenjem Konkurencijsko vijeće okončalo je višegodišnji spor koji sa "BH Telecomom" zbog njegovog uvjetovanja pri zaključenju ugovora o interkonekciji vodi alternativni telekomunikacijski operater „Akt.online“ iz Sarajeva, inače firma kćerka slovenskog operatera "Akton".

RJEŠENJE

1. Utvrđuje se da je privredni subjekt BH Telecom d.d. Sarajevo, Obala Kulina Bana 8, 71000 Sarajevo zloupotrijebio dominantni položaj na tržištu interkonekcije na fiksnu mrežu, uslovljavajući privredni subjekt Akt. Online d.o.o., Fra Andela Zvizdovića 1, 71000 Sarajevo da obustavi pružanje usluge odlaznog međunarodnog saobraćaja za UNITIC d.o.o. Sarajevo, kao uslov za zaključenje sporazuma o interkonekciji, što predstavlja povredu Zakona o konkurenciji u smislu člana 10, stav (2) tačka d) zaključivanje sporazuma kojima se uslovljava da druga strana prihvati dodatne obaveze koje po svojoj prirodi ili prema trgovačkom običaju nemaju veze sa predmetom takvog sporazuma.
2. Izriče se novčana kazna privrednom subjektu BH Telecom d.d. Sarajevo, Obala Kulina Bana 8, 71000 Sarajevo, zbog kršenja člana 10, stav (2) tačke a) Zakona o konkurenciji utvrđenog u tački 1. ovog Rješenja, u visini od 150.000,00 KM (stotinapedsedesthiljada i 00/100 KM), u smislu člana 48, stav (1) tačka b) Zakona o konkurenciji, koju je dužan platiti u roku od 8 (osam) dana od dana prijema ovog Rješenja. Ukoliko privredni subjekt BH Telecom d.d., Obala Kulina Bana 8, 71000 Sarajevo, ne uplati izrečenu novčanu kaznu u ostavljenom roku, ista će se naplatiti prisilnim putem uz obračunavanje zatezne kamate za vrijeme prekoračenja roka.
3. Odbija se kao neosnovan zahtjev privrednog subjekta Akt. online d.o.o., Fra Andela Zvizdovića 1, 71000 Sarajevo podnesen protiv privrednog subjekta BH Telecom d.d. Sarajevo, Obala Kulina Bana 8, 71000 Sarajevo radi utvrđivanja zloupotrebe dominantnog položaja u smislu člana 10, stav 2) tačke a), b) i c) Zakona o konkurenciji.
4. Odbija se prijedlog za donošenje rješenja o privremenoj mjeri privrednog subjekta Akt. online d.o.o., Fra Andela Zvizdovića 1, 71000 Sarajevo kao neosnovan.
5. Ovo Rješenje je konačno i biće objavljeno u „Službenom glasniku BiH“, službenim glasilima entiteta i Brčko distrikta Bosne i Hercegovine.

Faksimil odluke Konkurencijskog vijeća

No, kako saznaje "Avaz", menadžment "BH Telecoma" suočava se s novom kaznom. Firma „Akt.online“, naime, ponovo je upozorila RAK na nezakonito ponašanje "BH Telecoma", tvrdeći da "nastavlja s ucjenjivanjem i uvjetovanjem".

Najvećem bh. telekom operateru ovog puta se na teret stavlja jednostrano podizanje cijena drugim operaterima kod usluga terminiranja međunarodnih poziva u svoju fiksnu i mobilnu mrežu koje im je dužan pružiti.

Uskraćene usluge

Kako tvrde u firmi "Akton", istovremeno je "BH Telecom" stranim operaterima za isti servis ponudio povoljnije uvjete, a kada njihova kćerka firma u Sarajevu nije na to pristala, "BH Telecom" im je 14. februara uskratio daljnje pružanje usluga.

- Obračali smo se RAK-u, koji je izrekao mišljenje da se odnosi između operatera rješavaju na principu komercijalnog dogovaranja. Međutim, "BH Telecom" se oglušio na sve naše apele i nastavio s blokadom koja svakodnevno rezultira našom poslovnom štetom, ali, također, znajući da će njegova protuzakonita aktivnost završiti novom kaznom i novom tužbom - kažu u "Aktonu".

Redovne platiše

Iz firme "Akton" kažu da su dodatno začuđeni ponašanjem "BH Telecoma" ako se zna da njihova kćerka firma u Sarajevu „Akt.online“ posjeduje sve potrebne dozvole, važeće bankovne garancije te su sve fakture bile plaćane u predviđenom roku. Ističu i da je „Akt.online“ zvanično potvrdio "BH Telecomu" da će platiti cijenu koja je važila do kraja 2013., odnosno, kako kažu, "do ovog ekscesa".